



Pakistan PM Khan hopta ka tsungta menden yutsutsu akok

Goa CM atema Sawant-i tenangzuka agiogo

President Kovind-i Padma Awards agütsü; T Senka Ao-ia agizükogo



March 28, 2022 nü Rashtrapati Bhavan nung Wb. T Senka Ao-i India President Ram Nath Kovind ket nungi Padma Shri award agizükdang agiba noksa angur.

New Delhi, March 28, 2022 (Agencies): Hombarnü President Ram Nath Kovind-i Rashtrapati Bhavan nung Padma Vibhushan, Padma Bhushan aser Padma Shri awards 2022 lema agütsüogo.

Hombarnü Civil Investiture Ceremony-II nung President Kovind-i nisung 74 nem Padma awards agütsü.

Tanü Padma Vibhushan angurtem rongnung Hindustani classical music maven Dr Prabha Atre aser taoba taoba Uttar Pradesh CM & BJP lennir asür Kalyan Singh dena lir.

Külen, Padma Bhushan angurtem rongnung actor Victor Banerjee, Odia writer Dr Pratibha Ray, scholar Acharya Vashishtha Tripathi aser Bharat Biotech founders Dr Krishna Ella aser pa

kinungtsü Suchitra Ella nungertem lir.

Taküm nisung 128 nem Padma awards agütsür March 21 nü Civil Investiture Ceremony - I mezüngbuba agidang President Kovind-i nisung 54 nem Padma Vibhushan (2), Padma Bhushan (8) aser Padma Shri awards (54) agütsüogo.

Taküm Padma awards angurtem rongnung tetsür 34 dena lir aser külen Foreigners, Non Resident Indians & Overseas Citizens of India nisung 10 lir.

Padma Shri awards 2022 atema nisung 107 shimtetba rongnungi Nagaland nungia T Senka Ao dena lir. Literature and Education nung shilem tajung agiba atema pa nem Padma Shri agütsüogo.

COVID-19 Nagaland: Puteter aser taneptsü angur maliasü

Kohima, March 28, 2022 (TYO): Nagaland nung Hombarnü nisung ka dak danga COVID-19 meputet aser taneptsü angura maliasü.

Nisung 35,470 rongnungi 33,212 taneptsü nguogo aser ibaji taneptsü angur 93.63% lir.

Nagaland nung tang nisung 16 anepaludar saka parnok rongnungi nisung 2 dak dang shirangba yimya lir.

March 27, 2022 tashi nung

Covid vaccine indang dose 15,76,368 agütsüogo ta health department ketdangsür kati ashi.

Arishi küm 12 nungi 14 tsünga tanur 744 nem CorBEvax aser arishi küm 15 nungi 18 tainyinlong 92,338 nem Covaxin agütsü.

Arishi küm 18 ser tempur nisung 8,18,972 nem Covishield vaccine indang dose 14,84,286 agütsüogo, ta health department ketdangsürisa metetdaksü.

Arunachal Pradesh nung Covid mali kümogo

Itanagar, March 28, 2022 (Agencies): March 27, 2022 nü Arunachal Pradesh ya coronavirus-free state kümogo.

Lohit district nung COVID agi shiranger ka aliba March 26 nü taneptsü angur, ta health ketdangsür kati ashi.

Arunachal Pradesh nung nisung 64,484 dak putet aser iba nungi 64,188 taneptsü

nguogo, ta State Surveillance Officer Lobsang Jampa-i ashi.

"Tesüba ghonda 24 tsünga nisung shinga dak-a COVID-19 putetba osang mali" ta pai ashi.

Arunachal nung COVID-19 puteter nisung 296 süogo aser nisung 99.54% taneptsü angur.

Tang tashi nung COVID-19 alitsü akok ta temolung melemba sample lakh 12.68 tendangogo, ta Jampa-isa ashi.

Manipur anema NH-2 mokdangba magiener

Dimapur, March 28, 2022 (Agencies): Nagaland kübok Southern Angami Youth Organisation (SAYO) telongtet nung Manipur anema NH-2 mokdangba magiener.

Hombarnü SAYO mokdang tenzüker anogo tibuba süiogo.

SAYO-i Mongulbarnü Kohima nung Angami Public Organisation (APO) aser Angami Youth Organisation (AYO) teloktem den senden amentsü aser idangji tarutsü teinyaksü atema telemtetba agütsü.

Manipur sorkari Kezolta nungi sepaitem manien tashi mokdang magientsü ta SAYO president Metekhrielie Mejura-isa ashi.

Kezolta nungi Manipur armed personnel manienba anema SAYO-i March 21 nü ghonda 72 mokdang ayongzük aser March 23 ayaterm nungi mapang telatet makai mokdang atsulang.

Hombarnü SAYO volunteers-i tesem ana- Kigwema village aser Sakhabama kübok Zero Point nung highway mokdang anük.

Iba mokdang ajanga Manipur sorkari garitem NH-37 (Imphal-

Jiribam) leni security escorts dena senzüdaksür.

Nagaland sorkari iba tebilemtsü angateteptsü atema tenangzükba kar lir mali ta osangbeneri asüngdangdang "state sorkari onok dang mokdang anentsü mepishi aser mangatetep aliba ali dak sendakba kulikakettem agütsütsü ashi" ta Mejura-isa langzü.

Iba ken o ya SAYO aser Manipur sorkar tsünga kümogo, ta paisa ashi.

SAYO-i Nagaland sorkar nem nüngdakba kulikakettem agütsüogo saka tang tashi telangzüba kecha mali, ta Mejura-isa shisem.

Külen, Assam tsütsü NH-39 nung March 27 ayaterm nungi All Assam Manipuri Youths Association (AAMYA)-i mokdang ayongba ya tim masü, ta pai metetdaksü.

AAMYA-i kütepa mokdang ayongba ta mangateter kechiyong item mesükba ken o angateteptsü atema lenmang tajungtem lir, ta paisa ashi.

Mokdang anentsüba ya Manipur sorkar dak dang keta lir

ta Mejura-isa metetdaksü.

Ajisüaka, March 26 nü Manipur chief minister N Biren Singh-ibo Manipur Assembly nung "police alidakji Manipur lushi metre 100 telongtet nung yanglua lir" ta ashi.

Iba tesem ya Manipur nunger ali lir aser ibaji internationally recognized satellite map nung jangjajangja angur, ta Biren-isa ashi.

SAYO-i mokdang ayongba ya Manipur sorkar o Nagaland sorkar tsünga mangatetep masü aser sorkartemi state level nung angateteptsü merangtsü, ta paisa metetdaksü.

Iba ken o ya state level nung mekoktetra, Centre sorkari mediator ka ama central level nung angateteptsü ta CM Biren-isa ashi.

Külen, Nagaland Medical Dealers Association-i SAPO dang Manipur leni taküm kümzüksü mozütem belentsü mepishia metetdaksüogo.

NH-2 ya Manipur atema tongtipangtiba lenmang lir aser iba nung garitem mesenzüdaksüba ajanga mozütem bener mouteter aser Manipur nung alirtem timtemer, ta NMDA-i ashi.

Guwahati nung NERPC indang 22 buba senden amen

Guwahati, March 28, 2022 (TYO): March 28, 2022 nü Guwahati nung North Eastern Regional Power Committee (NERPC), Ministry of Power, Government of India indang 22 buba senden menogo.

Iba senden nung North East Region (NER) state tem nungi Power Minister tem den central aser state power utilities ketdangsürtem aden.

Iba senden nung mendenbuba ya NER state tem tsünga melentepa agir aser tan senden nung mendenji Nagaland

Chief Minister Neiphiu Rio liasü.

NERPC ya inter-regional power sector dak sendakba onüktem lemsateptsü atema sabang tajung ka lir, ta CM Rio-i ashi.

Tanü amenba senden nung India sorkar indang North East Region Power System Improvement Project (NERPSIP) onük den reliable communication ulushitsü aser hydro plants renloktsüba onüktem benoka lemsatep.

"NER nung hydro maparen tulu inyaksü moaja lir aser iba

tajangzükji agitsüla" ta NERPC convener aser Member Secretary B. Lyngkholi-i ashi.

March 26, 2022 nü Technical Coordination Committee (TCC) senden nung technical dak sendakba onüktem jembigo.

Iba senden ya Chief Engineer(T&G), Department of Power, Nagaland Penrithung Yanthan menden ser amen.

TCC nung jembiba onüktem NERPC forum dang nungi telemtetba aser temelaba meshia aben.

Mizoram nung 'common school uniform' asemtsü sentong yanglur

Aizawl, March 28, 2022 (Agencies): Mizoram nung development board kati primary nungi higher secondary level tashi sorkar school tem nung school uniforms kasa dang asemtsü tebilemba lemsatepogo.

Mizoram education minister Lalchhandama Ralte lenisüba kübok state Human Resources Development (HRD) Board-i sorkar school ajak nung school uniforms kasa dang asemtsü

tebilemba benogo.

Chief minister Zoramthanga-i aniba Mizo National Front (MNF) sorkari board 14 tentetba nung Human Resources Development Board ya ka lir.

Iba ya Mizoram state sorkar indang Socio-Economic Development Policy (SEDP) mapa inyaksü atema inyakba mapa ka lir.

Centre sorkar school tem, state kar nung aser Mizoram

nung Presbyterian Church kübok English medium school ajak nung common school uniform beshir aser iba ya inyakyim tasen ka masü ta MNF MLA L. Thangmawia-i ashi.

"School nung lower level nungi higher level tashi nung uniforms balala asütsü akok. Primary schools nung asema uniforms ji middle, high aser higher secondary levels den balaka asütsü akok" ta pai ashi.

Myanmar refugee tem Mizoram nung maneni jenoker

Aizawl, March 28, 2022 (Agencies): Myanmar army aser Chin National Defence Force (CNDF) tsünga rara manenba ajanga Myanmar kübok Chin state nung alirtem Mizoram-i aruba manener.

Mizoram kübok Myanmar nunger 26,663 tashi jenoka lir ta Deobarnü osang metetdaksü. Mizoram-i Myanmar den kilometre 510 agi arrtsütepa lir. Mizoram kübok Champhai, Siaha, Lawngtlai, Serchhip, Hnahthial aser Saitual district temi Myanmar den arrtsütepa lir.

District 6 nung Myanmar refugee 22,098 tashi jenoka lir aser nisung teimtibaji Champhai nung nisung 7,810 jenoka lir.

Honibarne Myanmar army-i Zokhawthar yim anasa Chin National Defence Force (CNDF) indang tesep ka amak.

Minister Metsubo-i Wokha nung BDO office semzüksü



Minister, Metsubo Jamir-i Project Colony, Wokha nung Block Development Officer office building tasenba semzüksü dang tangokba noksa nung angur. (Wokha, March 28, 2022)

Dimapur, Metsüremi/March 28 (TYO): Minister, Rural Development, Metsubo Jamir ajanga March 28, 2022 nü Project Colony, Wokha nung Block Development Officer office building tasenba semzükja liasü.

Iba sentong nung jembidang Metsubo Jamir-i ashiba agi, Department of Rural Development ajanga yimdak-yimtsüngtem nung nüburtem ajangzüksü asoshi maneni inyaka arur.

Pai nüburtem aser yimtsüng nung lenirtem dang nüburtem ajangzüksü asoshi terenlok tali bener arutsü atema sorkar aser department den yaritepsü aser amalitep akatsü ayongzük liasü.

Pai sentong nung adener dang VDB (Village Development Board) ajaki akumtsübutüsü ajungshi, kechiaser terenlok mapa ajak iba yagi inyaker.

Minister Metsubo-isa yimtsüng nung lenirtem dang rongsenketzüng lenmang aliba maparen nung tali temolung agütsüsü ayongzük liasü.

Department-i BDO office nem ki tasen ka agütsüba tem ADC Wokha, Lankonsen Tsanglao-i pelaba lemsatsep aser ibai Wokha nüburtem asoshi temoatsü ka lir, anungji ajaki kanga kumdanga amshitsüla, ta pai ayongzük.

Paisa yimtsüng nung lenirtem dang temolung agüja inyaksü ayongzük aser pei

yimtsüng nung terenlok atema agütsüba scheme aser sentongtem shidak amshitsü aser inyaksü ajungshia liasü.

Director, Rural Development, Liboni Humtsoe-ia ibai department asoshi mapang tajung ka lir, kechiaser mapang talangka nungi BDO office tasen ka nungdaka aliba asangsang kumogo, ta ashi.

Pai BDOs aser staff tem dang nüburtem ajangzüksü asoshi bendanga agütsür inyaksü ayongzük liasü.

Iba sentong nung Project Director, DRDA Wokha, K. Shekiho Phuleshe menden liasü aser BDO Wokha, Albert Patton ajanga melepzüng o jembia liasü.

5 buba Pariksha Pe Charcha sentong agitsü

Dimapur, Metsüremi/March 28 (TYO): Ato Kilonser Narendra Modi-i kaketshir, tesayur aser tsüraburtem den sensaksemba sentong Pariksha Pe Charcha (PPC 2022) 5 buba April 1, 2022 anüngdang 11:00 ako nung alitsü, ta Directorate of School Education ajanga sangdong ka nung metetdaksü.

Iba sentong ya DD National, DD News aser DD India channel tem nung live sayutsü.

PMO, NaMo App, MoE, Doordarshan, MyGov.in indang websites aser MoE indang YouTube channel aser Facebook Live nunga angutsü aser ano MoE indang Swayamprabha channel nunga angutsü.

Iba dak sendakba nung Nagaland state kübok lapoka aliba school (NBSE/CBSE/ICSE, Both Govt. & Private) ajak indang tekolakpur dang kaketshir class 6 nungi tema iba sentong reprangtsü atema nungdakba mera agitsü metetdaksü.

TV/Internet facility maliba tesem nung iba sentong All India Radio (AIR Medium Wave, AIR FM Channel) nung live aruba angatsü asoshi achayang asütsüla, ta sangdong ajanga ashi.

Iba sentong atemba sülen school ketdangsurtemi kaketshirtem PPC 2022 sentong reprangba indang noksa ka bosa

(timba agi noksa pungo) MyGov portal nung nisung kwikati reprang, ibaji tejangja zülur April 2, 2022 tashinung upload asütsüla.

Terepranger tejangja den noksa ka mesüra ana DoSE Nagaland Online School Monitoring Portal (Activity Report Tab) nung April 2, 2022 anüngdang 11:30 ako tashinung upload asütsüla.

Maneni kaketshir, tesayur, tsürabur aser ketdangsur temi PPC 2022 sentong reprangdang tangokba noksa tem social media nung hashtags #PPC2022 aser #ExamWarriors amshia upload asütsü ajungshir, ta sangdong ajangasa ashi.

Jalukie nung Poshan Pakhwada sentong tenzük



Dimapur, Metsüremi/March 28 (TYO): Temang anema alitsü aser temang asoshi chiyongtsü shidak chia-ajemba awareness agütsüsü atema March ita ya Poshan Pakhwada ama amunger, aser iba dak sendakba nung Social Welfare Department, Peren kübok ICDS Jalukie ajanga March 28,

2022 nü CDPO Office, Jalukie nung block level Poshan Pakhwada tenzük liasü.

Iba sentong nung CDPO Jalukie, Namhuheing ajanga Jan Andolan Movement indang onük nung jembi aser Anganwadi Worker tem dang nüburtem nem health aser nutrition indang awareness

agütsüba nung shilem agitsü ayongzük liasü.

Iba sentong nung Poshan Project Coordinator, Kekungdibo menden liasü aser AWW, Vizenjo ajanga Poshan Pledge ketdang süa agi aser Supervisor Jalukie, Kalivi Zhimomi ajanga melepzüng o jembia liasü.

Dimapur nung ali temoyangluba training agütsü

Dimapur, Metsüremi/March 28 (TYO): Bio-Organic Quality Control Laboratory, District Soil Conservation office, Dimapur nung March 24, 2022 nü nungi tenzük March 26, 2022 tashi 'Mother Culture Maintenance, Mass production, and Storage of Bio-Fertilizer for Promotion of Organic Farming in North East India' training sentong ka ayongzük agia liasü.

Iba training ya College of Post Graduate Studies in Agricultural Science, CAU (Imphal), Umian, Meghalaya ajanga ayongzük aser Director, Extension Division ajanga sponsor süa liasü.

Iba sentong nung shisalen sayur Dr. Dwipendra Thakuria, Dr. Juri Sandhya Barik aser Dr. Sapu Changkija nungertemi 'Acid Soils of Nagaland and its productivity challenges', 'Bio-fertilizer as a component of organic soil management

practice', 'Jhum cultivation', 'Preparation of culture media, broth cultures for mass production of bio-fertilizer', 'Extraction of Rhizobium from the soil and root nodules and their maintenance on YEMA plates', 'Inoculation and incubation of broth culture' amala onüktem nungi jembia liasü.

State organic policy den lirumedema state sorkari 2021-22 mapang district ana nung biofertilizer production units amenoka lir aser ano tanünga district ajunga nung amenoktsü lir.

Agriculture Production Commissioner, Nagaland indang office ajanga Central Agriculture University, Imphal nungi technology asem tashi state sorkar dangi yoka lir. Yangji bio-enhancer ana aser biopesticide ka lir.

Iba training nung Agri aser sendaktepa aliba department nungi nisung 26 dena liasü.



Dimapur Ao Lanur Telongjem (Merali Unit) 3 buba Lokti Senden March 26, 2022 nü kimen Obangwati Pongen kidang mena liasü. Iba senden nung Aotemsu (taoba tir, DALT) aser Tiatemsu Longchar (tir, DALT) nati telok ayongzük aser asen Aoertem kin aser tükong mereprangi ka kuma longjemmer tejakleni mera aotsü tenapronglai ajungshia liasü.

SD Jain Hr. Sec. School nung angati LN4 Prosthetic hand camp akatsü

Dimapur, Metsüremi/March 28 (TYO): Temang nung mokokmein aliba nisungtem (Persons with Disability) atema SD Jain Higher Secondary School, Dimapur nung April 2, 2022 anepdang 8:45 ako nungi tenzük angati LN4 prosthetic hand camp akatsü.

Ibai Digambar Jain Samaj

kübok SD Jain Charitable Clinic Dimapur ajanga ayongzük alitsü.

SD Jain Charitable Clinic indang secretary ajanga iba teyari agitsüpur ajak Aadhaar card/election card mesüra danga identity document tem bener anepdang 8:00 ako tashinung iba tesem arua atongtsü metetdaksüogo.

Chedema nung BBBP kübok awareness sentong agi

Dimapur, Metsüremi/March 28 (TYO): District Level Centre for Women-Mahila Shakti Kendra, Kohima ajanga Water Resources Department den lungjemmer BBBP kübok awareness sentong ka March 28, 2022 nü Chedema Village, Bawe, Kohima nung agia liasü.

Iba awareness sentong ya Water Resources Department kübok scheme ka liasü.

Sentong nung Kesoneinuo Kense, District Coordinator, DLCW- MSK liasü aser

Neipechau Mepfhuo, Women Welfare Officer, DLCW-MSK ajanga MSK scheme indang rateta ashi.

Iba sentong nung shisalen sayur SDO, Kohima Division, Er. Phutheguo Khawakhrie liasü. Pai Water Resources Department kübok scheme balala indang rateta ashi aser item scheme tem agitsü lenmangtem sayua liasü.

Sentong nung Vikeduozo Sorhie, District Coordinator, DLCW- MSK ajanga melepzüng o jembia liasü.



West Tripura district kübok Mandwai nung Bharatiya Janata Party indang Mandal office ka raksatsü aser osettem rongdoktsüba noksa nung angur. Iba mapa ya TIPRA Motha züngsemtemi inyak ta BJP züngsemtemi tai tongloksür. BJP-i Khai Rai village council area nung züngsem tasentem aniokba sentong ka agiba ajanga mepetmesü adok ta osang ajanga ashi. (Agartala, March 28)

Assam nung petrol jenjang Rs 100 tema kümogo

Guwahati, March 28, 2022 (Agencies): Tawa Assam ajunga nung totzü jenjang tujuen atuba ajanga Deobarnü Assam State kübok district trok nung petrol jenjang Rs 100 tema kümogo.

Ano külen, Guwahati densema tanga district 18 nung yaktasa petrol litre nung Rs 100 dak tema atutsü.

Deobarnü Assam kübok Lakhimpur aser Majuli nung petrol jenjang tasakba aküm, kong tesem anaprongla nung petrol litre 1 jenjang Rs 101.13 kümogo.

Lakhimpur aser Majuli dak alaka, poisa 55 atuba sülen, petrol jenjang Rs 100 tema

atuba district pezüji Dima Hasao, Dhemaji, West Karbi Anglong aser Biswanath asütsü.

Hombar anogo densema petrol aser diesel jenjang ya hopta ka tsüingda trokbenbuba atonga tuogo aser tan poisa 30 atuba ajanga petrol jenjang litre nung Rs 99.02 tuogo, koba sen 100 ajungtsü asoshi sen 1 agi dang matong lir.

Iba den bendenloksema, Guwahati nung diesel jenjang poisa 35 shi tuogo aser ibajagi Hombar nung diesel litre nung Rs 85.18 kümogo. Deobarnü diesel jenjang poisa 55 tua liasü.

Taoba hopta, oil firm temi

totzü jenjang trokben yanglushia liasü, koba ajanga petrol jenjang aoksa dang umketa tuadok. March 22, 2022 anogo nungi anogo ka dak alaka, oil company temi petrol aser diesel jenjang tuja arudar.

November 26, 2021 nungi March 20, 2022 tashi Guwahati nung petrol jenjang litre nung Rs 94.58 liasü aser tanga district nung Rs 94.58 nungi tenzüka Rs 97.12 tashi atu.

Tesüiba küm ana nungi Guwahati nung petrol jenjang litre nung Rs 26 shi tuogo, koba March 27, 2020 den medemdangra 27% shi atur asütsü.

Assam Opposition-i jenjang atuba anema lungkak ait

Guwahati, March 28, 2022 (Agencies): Hombar nung Assam Legislative Assembly nung Opposition züngsemtemi jenjang atuba indang onük jembitsü asüingdangba Speaker-i mapang magütsü aser iba sülen Assembly nung mepetmesü adok.

Question Hour sülen Opposition Leader Debabrata Saikia-i adjournment motion benoktsü merang aser idangji Speaker Biswajit Daimary-i adjournment motion thinenogo ta ashi.

Congress nungi iba indang osang agüjaka Speaker-i mapang magütsü. "Inyakyim lateta aliba ama House madenshidang ghonda ka jakdang notice agütsütsüla.

Tanep 8.35 nung notice angu saka House tanep 9:30 ako nung tenzüik" ta Daimary-i ashi.

Speaker-i adjournment motion alitsü magizükba atema tejashi sayua opposition züngsemtemi assembly nung maden.

Jenang atuba indang notice ya tanep main secretary dangi yok saka Speaker-i mapang shitak nung notice magütsü ta ser assembly nung jenjang atuba onük jembitsü memela.

"Jenang atuba onük jembitsü atema mapang balaka meshi. Ajisüaka, speaker-i temelaba magütsü" ta Nazira Constituency MLA Debabrata Saikia-i ashi.

"Assam nung tensa ya Sri Lanka dang nungi tamajungba akümer kechiyong Assam

sorkari sen apuba manener. Anogoshia Assam nung jenjang tupet atur" ta Sivasagar MLA Akhil Gogoi-ia ashi.

"Assam chief minister-i jembiba ama meinyaker. Chief minister-i mezüing küm mapa lakh 1 adoktsü nangzük, saka pai iba ya advertising ta ashir" ta Rafiqul Islam-i osangbener dang ashi.

Operation 'Charkhar' tenüing amer Assam Transport Department-i Assam nung nungi tajangzük agiogo. Tesüsabuba Covid onük ajanga public atema senotsü timtem bentsür aruogo, ta paisa ashi.

Sorkari jenjang atuba maziüktet aser iba ajanga kecha masüba nisungtem timtemer, ta Congress-isa metetdaksü.

Taoba Sikkim CM BB Gurung arishi küm 92 nung süogo

Gangtok, March 28, 2022 (Agencies): Taoba mapang Sikkim Chief Minister, BB Gurung süogo. Hombar anepdang 6:00 ako meta Gurung asü. Pa arishi küm 92 liasü.

BB Gurung ya Sikkim State indang Chief Minister tasembuba liasü. 1984 küm Sikkim CM inyaksü asoshi pai tenangzüktep agi aser pai anogo 13 dang CM inyaka liasü.

Himalayan State indang putiotsü nung Sikkim State indang Chief Minister kümsük tatsütiba inyaker rongnung Gurung liasü.

Pai aniba sorkar tsükadok aser State nung President rule benokba ajanga latetja aliba kümsük tashi BB Gurung-i CM meinyaktet.

1984 küm Gurung-i May 11 nungi May 24 tashi office nung CM ama inyak.

Yimtenren nung majemokdang, Gurung-i osangbener (Journalist) ka ama inyakogo.

Kolkata kübok amenoka aliba Amrita Bazar Patrika atema Gurung-i staff reporter ka ama inyaka liasü.

Gurung ya 1929 küm October 11 nü Anüolen Sikkim tsütsü Chakhung yimtsüing nung aso.

Gurung ya Darjeeling nung St Robert's School indang alumni ka liasü.

Sikkim Rajya Congress Party indang züngsem ka ama 1947 küm Gurung-i yimtenren mapa nung inyak tenzüik.

Numaligarh nung nisung ka shidi lokti kati ajemset

Guwahati, March 28, 2022 (Agencies): Deobar aonung Numaligarh tesem nung shidi telok kati arishi küm 28 tebur ka ajemset.

Tasüsang ya Numaligarh, Golaghat kübok Doigrung tesem nung alir Aghnu Karuwa ta jangjaogo.

Asür kinungertemi ashiba agi, Aghnu ya shishilembadak nungi kidangi meyipa arudang shidi telok ajurua pa tepset.

Deobar aonung onok chiyonger sülen Aghnu ya ki tonga maruba metetta aküm aser onoki pa bushitsü tenzüik,

ta Aghnu'er adianutemi ashi. Adianutemi Aghnu bushiba mapang kidanger kati arem ka anasa lenmang nung Aghnu indang tasüsang anguba osang agütsü.

Parnok tonga aoba mapang arem shidi lokti ya Aghnu tasüsang anasa liasü aser mang bener arutsü atema forest ketdangsürtem aja.

Aghnu tasüsang ya post mortem atema yokogo aser forest department ajanga shidi lokti ya arem telungi meintsü merangdar.

Arunachal Police-i Graffiti artist Neelim Mahanta apu



Neelim Mahanta (File photo)

Guwahati, March 28, 2022 (Agencies): Itanagar kübok 'Wall of Harmony' nung anti-dam graffiti yangluba atema Arunachal Police-i Lakhimpur nungi Graffiti artist aser activist Neelim Mahanta puogo.

Lakhimpur nung Neelim talidak Itanagar Police team ka tonga aru aser pa Itanagar Police Station-i anir ao.

Dibang nung teyangludak aliba dam ka anema longkak aitba sayua graffiti ka yanglutsü asoshi Neelim ya Arunachal Pradesh-i jaok.

Arunachal Pradesh nung 57000 MW Mega Dams yanglutsü aliba anema longkak aitba den iba graffiti sendaktepa

liasü. Ajisüaka, Neelim apuba atema Arunachal Police-i telangzüba kecha magütsü.

Sangdong ka ajanga angazükba agi, Wall of Harmony nung pai iba graffiti yangluba ajanga police-i pa pua alitsü akok. Itanagar nung Secretariat Building Wall nung 'Wall of Harmony' ya art project ka lir.

Lisopur tentet balalai, iba graffiti yanglutsü atema Arunachal nung lisopurtemi pa jaoka liasü aser iba mapa atema pa nem taa tasüsa agütsüogo ta shia Neelim tangsa chiochtsü asoshi parnoki takhangba agütsü.



Hynniewtrep National Liberation Council (HNLC)-i yimjung olemtep nung parnok 'representative' inyaksü atema Sadon K Blah shimba osang metetdaksüogo. Deobar nikongdang HNLC general secretary Saiñkumar Nongtraw-i Sadon K Blah shimba osang metetdaksü. (Shillong, March 28)



TIR YIMYIM YIMOBILEM (EDITORIAL)

DIMAPUR SANGTENNÜ, METSÜREMI (MARCH) 29, 2022

Plastic mamshi maremer

Akhidangbo shishilemba daki jangotsü alii aodang yangku bener ao, kechiyong dokan nung aliba kechisarina ajak osangkaket tejen nung alepersa agütsü. Ajisüaka, küm ishika jakdang ajungbena ka dang, dokan nung oset alirtem nem osettsüset seper agütsütsü asoshi plastic agi yangluba yangku tulu aser tila tapu balala nungdak ajak nung amshitettsüsa aru. Iba denji chiyongtsü aser tajemtsü tapu balala ajak khen jemerbo endoktsüsa plastic pongdang nung enoker ayok. Aji oda, tzü molur jema aliba to mapa mebului melamelaa dang ajemtsüsa plastic pongdang tulu aser tila tapu balala nung tzü zür ayoktsü tenzük. Atangji, dokan nung asenoki kechisarina aliba ajak plastic yangku nung seper agütsü tenzükba agi, asenok nem anisüngzük tuluka agütsü aser tzü aser tajemtsü tapu balala plastic bottle nung enoker angubaji asenok asoshi mapa aika nung ayongayonger anisüngzük angu. Iba jagi asenok mapa aika nung kanga ngajadokogo. Anungji, tangbo dokan nung plastic yangku mengura asenok kanga timatemtsü aser plastic bottle nung tzü mengura mapa kanga bolutsü. Ajisüaka, alima nung taküm alibatam asoshi lendongji plastic amshiba nung ya keta lir ta reprangteta, taoba küm ishika jakdang nung ya lima tesem balala nung khen dang amshir endoktsüsa plastic agi yangluba osettem meyanglutsü aser mamshitsü alizüng yur inyak tenzükogo. Aji oda, India nunga taküm 2022 küm tashi nungbo linük nung khen dang amshir endoktsü yangluba osettem, dokan nung oset seper agütsüba polythene bag aser tzü bottle ama plastic osettem meyanglutsü aser mamshitsü sentong nung nübortem nem tangatetba agüja arur. Iba alizüngji yur, linük nung plastic mamshitsü ajungshitepba mapang aser Nagaland nunga joko tesem aser mapang aika nung plastic agi yangluba auso, marok, tzü bottle aser dokan yangkutem mamshitsü telemtetba agir ajungshitepba tialong nung, Covid-19 wara agi menep. Ashi, tang yabo Nagaland nunga dena khen dang amshir endoktsüba plastic osettembo tangua mangutsüsa kümer lila. Ajisüaka, Covid-19 wara aruba agi, plastic agi yangluba osettemsa anepalurtem asoshia tezúbaba asünungji, joko plastic mamshi maremer quarantine nung amongertem nem plastic auso aser marok nung chiyongtsü aser plastic tzü bottle ta agütsü tenzükba nungi, tang tashi asen lima nungbo plastic mamshitsü ken o kecha renema mali amai benjongbentsü aser shishilembadak ajak nung khen amshir endokba plastic yangku, plastic auso, marok, jamos, fork aser plastic bottle talubosa amshiba angur. Asenok aikati alima nung plastic mamshitsü özüng latetba aser ajungshiba ya tangar kar junglangtsü aser asenok akoksatsü asoshi inyaker amai bilemer, iba jagi asenok aikati kecha hau ta mali khen dang amshir endoktsüba plastic agi yangluba osettem amshir. Ajisüaka, alima nung aser asen alidak dena akok tashi plastic mamshitsü ajungshitepbaji tangar asoshi masü saka asenok anema alitsü atema aser asenok ali aser tzü-mopung memenen chiyongtsü tajung züsenteta achitsü tangatetba nung ajungshiteper. Tetezü, asenoki mebilemdangi plastic amshiba ajanga ali tema, telong aser tzüim aser ayong ajak nung asenoki endokba plastic to agi asünger aser iba jagi ali aser tzü nembanga yur, yangji taküm alirtem asoshi chiyongtsü madoker aser ali aser tzüjia nisungtem asoshiibo miim akümer. Plastic agi yangluba osettem ya asenoki amshir külen rongdokyonga mali kuma yangsaabo maor, anungji itemji ali tema telong aser tzüim aser ayong nung nangdener. Iba jagi taküm alitsü tasakba tasakba kümdaktsür. Atangji, tang asenoki amshiba plastic agi yangluba osettem ya asenok nungdak reprangteta yanglubatem lir, anungji kanga nungdaker. Iba nungdakji angateta, alima nung plastic kenyongi mamshitsü ta masü saka plastic-sa asüyong amshir endokba sülen, kopi melii kaket ama ali kuma shizüka aotsüsa yangluba plastic osettembo amshidaktsür. Ano, plastic melena kaket agi dokan yangku, auso aser marok yangluba agi lanurtem karbo mapa tasen tenzükogo. Iba amaji plastic melena tanga amshia asen nübortem nungdak peridaktsütetsüsbaji lanurtem kolok aser teka nungi adoktsüla. Nübortem timtem tia ajuruba ajanga kari parnok asoshi langka tajung aser tasen ka yanglutetter. Tanüa asenok plastic mamshitsü ajungshitepba mapang ya, asenoki asen lima nung akaba rongsen, süng, long, aou aser süngo tu dena agi plastic agi yanglua akaba osettem melena yanglutsüba indang asenoki bilemdangtsüla. Aji oda, tang amato, asenok ya plastic mamshi maremtsüsa masü saka plastic agi yangluba osettem menungdaktsüsa asenoki inyaktetsüla. Iba jagiang asenok aser asen chirnurtem alima nung tzü mopong tajung agia anema alitsü aser azükarutsü.

OLEMSABANG

TEMELENSHI ADOKDAKTSÜBA LENIR SHIMTSÜLA:

Mosa taküm otsü nungi tangazüktsü kar

- Temsüyanger

(Yashi adok nungi...)

5. Tatidang nung tsüktsü lendong tekümdangtsü nübortem dang ajungshiba: Kodang Mosa Sinai tenem nungi talangka malu, nübortem Aron dangi arua ashi, "Mosa shiba asenok Ijip lima nungi aniteta anir aru, pa kechi aküm onoki memetet; anungji asenok len anitsü asoshi tsüngrem ka yanglujang" (Ani. 32:1). Idangji Kibubai Mosa dang ashi, "Yakta meyipa luang, kechiaser ne nübör shirnok nai Ijip nungi anizüka anir aru; parnok raksa-a kümogo. Ni melaba leman nungi parnok meyipogo, parnoki hon agi nashi süngyanglu ka muluteta iba nemji tarongba tenla agüja külemdaki. Ibaji parnok tsüngremtem; shibai parnok Ijip lima nungi anir aru ta parnoki ashir. Ano Kibubai Mosa dang ashi, iba nübör tekong temerang ta ni ngugo. Anungji kü ain tulu parnok anema adoka parnok samatsütsü asoshi tang kü kija tokjang. Aser ni na agi kin tulu ka kümdaktsüdi" (Ani. 32:7-9). Kodang Aroni nübortem jabang mayimi kümdaktsüba ajanga tsükchirtemi sensatsüogo ta Mosai angu (Ani. 32:25). Anungji Mosai nübortem dang ashi, "Nenoki tetsübutsüka temenen menaogo. Saka ni tang Kibuba dangi tua nenok asoshi temenen pungitsü atema ni pa dang mepishitsü" (Ani. 32:30).

Mosai nübortem temenen asoshi jembi aser parnok menen pungitsu asoshi Kibuba Tsüngrem dang mepishitsü nangzük; pai nübortem ajungshi, saka nübortem taküm mesüra tasüba, temoatsü mesüra atakatem shimtsü asoshi ayongzük. Tashi angaba ajanga temoatsü, takokba, yimjung, azükaru aser yimchiyimjung, saka tashi mangaba ajanga tashitak, ayawara, takoksa, alar tia, pei senmang samaba aser taküm temoatsütem ajunga samatsü indang ayongzük. Mosai talisa nübortem tamangba tai nung metsüktsü asoshi ajungshi. Moab lenden nung Mosai Israel nübortem dang tatemsa ashi, özüng akhümtsübuba ajanga kija aser nübortem asoshi temoatsüba, saka akhüm metsübuba ajanga tasüba. Kibuba nungi Mosa dangi kechi aru ibaji nübortem dang sayu, tarutsü pututem aser nübortem akhümtsübuba alitsü asoshi ajungshi.

Mosai meneni ashi, tenangzükba lima tonger külen Israel nübortem Yihuva Tsüngrem dak mamangba nübortem den alitsü. Azükarua alitsü, jangratema alitsü asoshi senti mapang aika ajurutsü. Saka item ajunga jagi ano lendongtem bena arutsütsü ta pai tekümdangtsü ashi; par sobaliba aser temangba samatsütsü, asüküm aser konang nungsang parnoki ajangzükba nung Tsüngrem par sentong nungi pilatsütsü lending angatetdaksü. Aji saka nübortem Kibuba dak jenokra, par tesübatem jagi par leman shitak aser tarutsü leman shitak nung anitsü. Anungji Mosai ashir; "nai parnok metsübutsüla, Ijip ajak nung Kibuba ne Tsüngremi Farao dak inyakba bilemtetang," "...Kibuba ne Tsüngremi item küm lir lisem lima nung na koda anishi ajak nai bilemtetsüla," "Lisem lima nung nai Kibuba ne Tsüngrem koda ain adokdaksü aji bilemtetang aser tamadok" (Tazüng. 7:18; 8:2; 9:7). "Aser tang, Oh Israel, Kibuba ne Tsüngremi ne dang nungi kechi akhanger? Saka Kibuba ne Tsüngrem tsübutsü, pa leman ajak nung jajatsü, ne mulung ajak agi aser ne nela ajak agi pa dang meimtsü aser tenzüktsü, aser tanü ni nenok nem nenok ajungtsü asoshi agütsüba Kibuba özüngtem aser pa temelabatem benshitsü" (Tazüng. 10:12-13).

Mosa Lenisübai ajangzükba aser Pa Taküm nung Tongtibang Lenisüba kar

Mosa lenisüba ajanga Israel nunger lokti taküm nung tongtibang temelenshi ana bena arutsüba: (a) Kin terana lungjema kuma Israel kin aser par yimsüsuba yangertet; (b) Ijip lima alar tia nungi par nübortem anitet.

Mosai pa nübortem alar tia nung aliba angu, par nübortem aginübatem pai meteta liasü, saka nübortem alar tia nungi anitettsü asoshi sentongjibo Tsüngremer sentong liasü. Tsüngremi Mosa nem lenisüba khuret nungloktsü, aser aji ataloktsü asoshi Mosa dang Tsüngremer tenangzükba liasü. Mosa lenisüba ajanga par lokti taküm nung tongtibang temelenshi ana bena arutsüba: mezüngbuba nung, kin terana lungjema kuma Israel kin aser par yimsüsuba yangertet; tanabuba nung, Ijip lima alar tia nungi par nübortem anitet (Ani. 3:16-18). Mosai ajangzükbatem aser pa taküm lenisüba kar:

- i) Nübör mulungjang nung Mosa dak temulung lemtetsüsa pai mapa taküm agi sayu. Yamaji tarutsü asoshi teyimla nübortem nem agütsü. Nübortem pa dak temulung alem. Khen khen nübortem pa dang nemnemaka parnoki pa sülen anitaktsü nungnanga maliasü (Ani. 15:24; 17:3).
- ii) Tenangzükba lima arrtsü matong tashi pai nübortem ani. Pai nübortem dang nangzükba ama pai atalokdaksü. Lenmang nung timtem terokrong aika ajuruaka pai nübortem dang nangzükba kodanga medoktsü (Tazüng. 5:1-2; 7:18; 8:2; 9:7).
- iii) Pai nübortem lenmang nung ani, parnok yari, Tsüngrem aser nübortem tsüngda pa odanger liasü. Tsüngrem nungi nübortem pila-a pai meyok aser par Tsüngrem Yihuva mamatsü asoshi teti nübortem ajungshi (Ani.14:31). Pai parnok den jembi, sayu, aser lendongtem parnok dang sayu. Nübortem asoshi tatishitsü lenir ka pa liasü. Pa ochi shir lenir ka liasü.
- iv) Mapa kuma inyaktsü pai nübortem dang sayu. Tejakleni nübortem aotsü tejangraba aser parnok nükjidong ajangzüktsü asoshi pai teti nübortem nungita teyari agütsü (Ani. 14:14; Tazüng. 1: 29-30).
- v) Pa mabensabatem aser abensabatem pai meteta liasü (Ani. 3:7-12; Ani. 4:1; Ani. 4:10).
- vi) Pa kanga ajemaluba taküm aser kanga khuret bentetba taküm ka liasü (Ani.4:12-14).
- vii) Kanga tenendak nisung, nükjidong matong tashi nendaka inyakba lenir taküm ka. Küm aika nübortem azüngmeyakdak lenmang nung jajadang pa dak toachi agi sünga liasü (Ani. 14:14).
- viii) Tangar asoshi aria bilemba lenir ka liasü (Ani. 18:13-27).
- ix) Ajak nung pai Tsüngrem madang metaloka liasü. Tsüngrem Pa lenir aser teyariteper liasü (Tazüng. 31:7-8).

Iba Olemsabang nung lemsaba ken-o aser shisatsü ya iba oset zükuri bilemba ken-o ama tazünger angateta agitsü mepishir

Caritas aser Coca-Cola longjemer lendong agi kongshirtem yarir



Coca-Cola Foundation-i Philippines nung 'Typhoon Rai' ta ajaba yipru agi kongshirtem nem teyari agütsüdang tangokba noksa nung angur.

March 28, 2022: Philippines nung Catholic Arogo indang Caritas teloki US nung amenoka aliba Coca-Cola den longjemer 'Typhoon Rai' ta ajaba yipru agi kongshirtem yaridar.

March 25, 2022 nü Caritas aser Coca-Cola nati sangdong ka ajanga, Philippines kübok Negros Occidental province nung yipru agi kongshirtem nem parnoki kisüba osettsüset densema teyari balala agütsüdar, ta metetdaksü.

Yaküm December ita nung iba yipru agi Negros Occidental province tamajungba kongshia liasü, aser iba yipru ajanga aluyimba sector tsütsü dollar sen million 100 shi takoksa angu.

Iba yipru ajanga Negros Occidental province nung nisung 38 asüba densema Philippines nung nisung ajak senteper 375 asü aser kibong 20,000 dak tema talidak makai aküm.

Khristan telok- Caritas Philippines aser Coca-Cola

Foundation nati longjemer iba yipru agi takoksa angurtem ki yanglushitsütsü atema teyari bushir.

"Tawa Caritas Philippines aser Coca-Cola Foundation Philippines nati tang tashi shelter camps nung alirtem nem teyari balala lema agütsüogo," ta March 25, 2022 nü Caritas Philippines-i Facebook post ka ajanga metetdaksü.

"Onoki Arogo dak tamang akar, ibayongji onoki senotsü timi amshia teyari agütsütsü," ta parnokisa metetdaksü.

Caritas aser Coca-Cola nati Negros Occidental province kübok Kabankalan Diocese nung kibong 28,000 dak tema nem teyari agütsüogo.

Item teyari rongnung kilem atema injung, plywood sheets, kojala, solar lamps aser radio densema lir, ta Caritas-i metetdaksü.

Coca-Cola Foundation Tir, Cecilia Alcantara-i, onoki tang Caritas den longjemer inyakba nungi tatishitsü agia tarutsü

nunga corporations aser Arogo nati longjemer sensakertem yaritsü ayongzüker, ta metetdaksü.

"Corporation nung inyaker ka aser Khristan ka ama ni asoshi iba partnership ya kanga tongtibang, kechiyong iba ya ajanga Catholic Arogo aser nija sector na tsüingda tesendaktep tajung aliba sayur," ta Alcantara-i ashi.

Alcantara-isa nija company tem dang Catholic Arogo yaritsü aser timtem lendong balala agi kongshirtem yaritsü ayongzüker.

"Ozü Arogo züngsemtem tang tashi timtemdar. Parnoki tang tashi ki meyaglushiteter. Telok tsüingda tamang katetba ajanga partnership yanglur. Iba ama tamang katetba ajanga onoki iba partnership yangluogo," ta lai ashi.

Kabankalan nung tongti putir, Louie Galbines-i, tang tashi nung nisung 30,000 nem teyari agütsüogo, saka tang tashi parnok kidang electric light mali, ta metetdaksü.

Uganda nung Khristan yimsü agizükba kibong kadak acid shiloktsü

Nairobi (Kenya), March 28 (Agencies): Uganda linük nung Khristan yimsü agizükba kibong züngsemtem dak acid shiloktsü, ta osang ka ajanga metetdaksü.

March 8, 2022 nü Uganda nung Namutumba District kübok Intonko yimdam Muslim nung kinüngertemi arrshi küm 38, Juma Waiswa, pa kinüngtsü Nasimu Naigaga (32) aser par jala, Amina Nagudi (13) nung dak acid shiloktsü; taoba ita par kibongi Khristan yimsü agizüka liasü.

February 17, 2022 anepdang pastor ka par kidangi arua Khrista osangtajung lemsatapa liasü, iba sülen parnoki Khristan yimsü agizük.

Par kinüngertemi parnoki Khristan yimsü agizükba osangji angashiba sülen

parnok senden kati jaoka liasü.

Osangbener den jembidang Waiswa-i, "Iba senden nungji onok dang asüingdangyaba mapang nung onoki Yisu Khrista dak amangba aser Khristan yimsü agizükba metetdaksü. Parnoki onok dang Khristan yimsü tokjang ta ashi, saka onoki memelung," ta metetdaksü.

Iba sülen Khristantemi özü ki semdangba aser Bible study agütsüba ajanga onoki yimsü tasenba nung tera ayang, ta paisa ashi.

"Onoki Khristan yimsü toktsütsü memelungba agi kübu, Arajabu-i Koran (Muslim nung temeshi kaket) nungi Lai tekong kar azüng. Iba sülen Koran nung aliba ama parnoki onok dang nenok ya mamangertem, ta shia süng agi onok dak azük,"

ta Waiswa-i ashi.

"Iba sülen kübu takdangi telungi ia acid pongdang ka bener adokba sülen onok dak acid shiloktsüdang tanüngba rogotem jagi 'Tsüngrem tuluba, nenok asütsü temsüa lir' ta ayimden. Iba sülen parnok onok kinünger rongnungi jendok," ta paisa metetdaksü.

"Tamasabo onoki onok dak kechi tzü shiloktsüar memeteti liasü saka onok agenba mapang nung temang mesak tenzük aserbo maremtettsüsa tashi liasü. Khristan kati pastor ajaba sülen pastor-i onok Mbale nung aliba hospital kati anir ao, saka özü jalabo tamajungba küma Jinja nung aliba hospital kati anir ao," ta paisa metetdaksü.

March 9 nü parnok treatment tagidak mapang nung par ki-a rongdoktsüogo.

ANOGO ABEN TSÜNGREM DEN

Sarasadem ajanga sentsü melen

"Aser pai sarasadem dang, Pa tejak tereprangtsü melena adok"- Lk. 9:29

Kodang asenoki alima nung Kibuba indang bushidir tenem kolak ama tatalokba tenet teti angutsü. Item tenetji Pa asoba, baptiba, atitangba, sentsü melenba, kangki nung angenlokba, tasü nungi shia aruba aser kotaki atuba angutsü.

Kibuba Yisu taküm nung tatalokba rong nung tiyongtsüji Pa sentsü melenbaji alitsü, aser ibai tetezü aketba tenem temejongji alitsü. Ibai Tebui Techir dak temulung achiba jungkai adokba lir. Ano iba yagi asen Kibuba Mosa aser Elija dang nungi temaba ta jangjatsüba lir. Iba yagi asen Kibuba Pa yimli nung sentsü wangshia arutsü indang sayur.

Saka asenoki Luke 9: 29 nung aliba ojang asemji " Pa sarasadema alidang" sendokra asenoki tanelaren tayongzüka sendoker. Pa sarasadema alidang Pa tejak melenshi. Asenoki teti sarasadema lira Kibuba dak kichi atalok aji asenok daka ataloktsü. Tanelaren asenok daka terenlok kaa akümtsü. Anungji asenoki asen nükla nung Kibuba sentsü melenba yur sarasademi temelenshi adokdaksübaji reprangra -

Mezüngbuba nung, taküm jenjang tangatetba melenshitsür. Chichiba sarasademji asen tanelaren tenem kolaki atuba lir. Tenem kolak nungi alima noksa melenshia anguba ama sarasadem ajanga tanelarena melenshitsü. Kodang tenem kolaki tudir lenden nungi manguba tongtipang osettem tenem kolak nung jagi angur. Lenden nungi ki tulu ta anguba to tenem kolak nung iba ki tuluji tajento tila ka ama dang angur. Lenden nung tongtipang masüba osetem to tang tenem kolak nung tongtipang oset akümer, kechiaser lenden nungi nüngdak ajakbo ayimjema mangur.

Kodang asenoki sarasadem ajanga Tsüngrem tenemi tudir asen nüngdak aser tashi mait ajak aseni angur. Iba tenem nungi asenok Tsüngrem den lungjemba tesadema aser takangba angur. Mesükba aser chichiba ulubaji asenoki jangjaa angatetter. Lenden nung asenoki kanga tulu ta repranga aser bilemba ajak Tsüngrem den lungjemba tenem nung kanga ilaa angur.

Miim sarasadem tenem nungi Tsüngrem tenüki anguba ajak asenoki angur. Oset tulu ajak tila ama angur aser tila ajak tulu ama angur. Shi tejangraba tuluji, taginü tuluji sarasadem tenem nungi kanga tila angur. Kotaker mangdangji dang amungtema alitsü. Tiyazü aser ochi sarasadem tenem nungji jangjatsür. Asenok taginüba, shisabulu, tebilemtsü, sentong, mapa inyakba ajak idakji sütepa adoktsü.

Asenoki maneni miim sarasadem aliba ajanga ya ataloktsü. Kotaker Tebu den asenok miim temulungjang aliba ajanga ya ataloker. Asenok takok jenjang aliba temabai ajungketer. Kodang asenok temeyoktep lima nung ajungketer; kotaker tenük agi anguba osettem asen tenük agi angutsü. Iba anogo koda tepelatsü anogo asütsü!

India nung missionary tem anema mepishiba ken o ka SC-i magizük

New Delhi, March 28

(Agencies): Hindu nung telok kati Supreme Court dang India nung Khristan missionary temi inyakba mapatem mita reprangdaksüner, ta mepishia ken o ka agütsü, ajisüaka Supreme Court-i magizük.

March 25, 2022 nü Supreme Court-i Hindu Dharma Parishad telok dang, joko iba ama temepishiba agütsüra nenok dang senchi achitsü, ta metetdaksü.

2021 küm Madras High Court nung kasa temepishiba agütsü saka court-i magizükba sülen parnoki maneni Supreme Court nung kasa temepishiba agütsü.

Osangbener den jembidang Gujarat nung Khristan putir, Cedric Prakash-i, "Iba oshidang ya shidak agütsüogo, kechiyong linük temzüng nung senso ajak, talisa minorities nem temeden kasa agüja lir, aser ibaji sorkar aser judiciary nati kümzüka ayur," ta ashi.

Paisa, "Mezüngbuba nung, iba ya linük temzüng kübok Arla 25 alema lir, kechiyong iba arla ajanga tamangba yimsü mashie bentshitsü aser proktsü

atema India nung senso ajak nem temeden agüja lir," ta metetdaksü.

Akhidang nungi tang taliba Khristantem aser Muslim nungertem anema inyaker, anungji iba ya tangsa anentsüla, ta pai ashi.

Prakash-i, "Hindu Dharma Parishad ama teloktemi telemsa adokdaksür aser minorities anema inyaker, aser iba ya linük secular raksatsütsü nükjidong nung lir, anungji tekaraba nung parnok azüoktsüla," ta ashi.

Hindu telok jagi Supreme Court dang, "Linük anemertemi kangshia Hindu nungertem tanga yimsü, talisa Khristan yimsü dangi meyipdaksür. India nung telongjem tashi itshtitsü atema Khristan missionary tem income mita reprangtsüla," ta metetdakja liasü.

Khristantem kiojen mita mereprangba ajanga melungtet telok noklang aika tenteter aser parnoki bendanglen nungi sen aika angur. Iba senji amshia loktiliba anema inyaker aser linük nung yimjung raksatsütsü atema tai maketertem ajungmesor," ta Hindu telok jagisa metetdakja liasü.

OLONG PAITEP # 6125

1		2		3		4	5			
				6						7
		8								
9				10		11				
			12						13	
						14				
16						17				

- | | | | |
|----------------------------|-------|--------------------------------|-------|
| TIPILEN | | LANGTSÜNGLEN | |
| 1. Nisung jenti | - (5) | 1. Tenük telong | - (9) |
| 4. Tsük rudenba | - (5) | 2. Committee dang ajar | - (5) |
| 6. Temzüng tesashi | - (5) | 3. Yagi ki okdoker | - (7) |
| 8. S _ _ _ i | - (3) | 5. Yim lenmang | - (5) |
| 9. Nisung telemsa | - (3) | 7. Temoatsü keter meyipa aruba | - (9) |
| 10. Anogoshi | - (4) | 11. Kanga junga menemba | - (7) |
| 12. Ajanga aor | - (4) | 12. Majinü | - (5) |
| 13. Tsük rizüngdak | - (3) | 13. Tzuma nung senzüba | - (5) |
| 14. Tebang nungi adokba | - (3) | | |
| 16. Süngdong tatembangtiba | - (5) | | |
| 17. Mepupet | - (5) | | |

OLONG PAITEP # 6124 TELANGZÜBA

- | | |
|---|--|
| TIPILEN : | LANGTSÜNGLEN : |
| 2. Bangsemo, 6. Tiptem, 8. Jen, | 1. Yipten, 3. Nüja, 4. Sangro, 5. Milen, |
| 9. Talila, 11. Aren, 12. Tzübo, 14. Alia, | 7. Tulu, 10. Laza, 11. Aben, 12. Tiyong, |
| 16. Angati, 17. Odi, 18. Azü, | 13. Ajizük, 14. Aitsü, 15. Tasa, 16. Aina. |
| 19. Sünglang. | |



WARAKLA PUNGMANG :

- Warakla** : Tambu, yasüng pungmang nungbo niji sen peria bener Dimapur Hongkong market nungang shishia senzüya ngur saak aja.
- Alokba** : Haha, nia yasüngbo tetsür anaden jangratema kazüa senzür saak ati.
- Warakla** : Tetsür ana rongnungji ni ka liasü südi?
- Alokba** : Waa, na Hongkong market nung shopping aoba mapangto asüji tangar tatsür ana den senzü ati.
- Warakla** : Oh Alokba!

Lilir : WhatsApp

TANÜBO NAI LANGZÜANG

- Q. Linük koba ajanga "Dare2eraD TB" (TB tashidak samatsütsü atema Data-Driven Research ka) tenzüktsü?
- [A] Bangladesh [B] India
[C] Nepal [D] China

(Taruba adok nung onoki langzüksü)

YASHI ADOK TELANGZÜBA : Senapathy Kris Gopalakrishnan

AO OSHI ANGAZÜKDAK:

TANÜ ANGAZÜKTSÜBA OJANG



Meso

(v) mejanga aliba saakdaksü (awaken)

* Anepdang yakta kütsü ni meso

Meso

(n) tezü nung atangba süngjang mesük aonsutsü (bottlegourd)


* Meso ya shi nung enoka aso kanga junger.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo

1. Tenüng :
2. Tasoba anogo :
3. Küm : 4. Class :
5. School :
6. Talidak :
7. Salem osang :

NAI-A YA METETTER MA



1871 küm March 29 nü London nung Queen Victoria-i Royal Albert Hall (Royal Albert Hall of Arts and Sciences) semzüktsü.

SUDOKU # 6164

TELANGZÜBA # 6163

			8	7				1	9	3	7	4	6	5	2	8	
	1		4			9	7	3	7	4	6	2	8	5	3	9	1
				3		5	8		5	2	8	3	9	1	6	7	4
		2							3	1	9	6	2	8	7	4	5
			5	6	1	4			8	6	7	5	3	4	2	1	9
6	4	7		1	8	3			4	5	2	1	7	9	8	3	6
	6	8	1	5		2		7	9	3	5	8	1	7	4	6	2
	9		3			8			6	7	4	9	5	2	1	8	3
			7			4	6		2	8	1	4	6	3	9	5	7

OJANG LUTEP # 5710

- EPI :
- TSINYATEKÜ :
- PAMA :
- ÜNGDAANKA :
- UIMEY :
- APAMNG :
- TASHIK :
- NGNU :
- AKADINYOK :
- NGBTAJUA :

OJANG LUTEP TELANGZÜBA # 5709

PEI AJANGZÜKTSÜ DANG BILEMA INYAKBA JAGI
KODANGA ALIMA TEJAKLENI MAOTSÜ

TAN HOPTA ATEMA - KOMA SÜLA ?

Q. Nagaland Medical College ya renemer külen tesayurtem ajak Naga nunger asü nunga koma süla ?



March 28, 2022 nü Bhubaneswar nung Left Front züngsemtemi train lenmang mokdang longkak aitba noksa nung angur. Centre sorkar mapatongtem anema central trade unions- i longkak aitba sentong ya ayongzüka liasü.

Opposition party temi totzü jenjang ajemtsü akhanger

New Delhi, Metsüremi/ March 28 (Agencies): Hombarnü opposition party temi sorkar dang petrol, diesel aser LPG gas jenjang ajemtsü takhangba agütsüba den külemi iba onük nung Ato kilonser, Narendra Modi-i senden nung sangdong ka agütsütsüla, ta takhangba agütsü.

Opposition party temisa, Centre sorkari totzü jenjang atubaji Russia-Ukraine rara ajanga lir ta jembir ajisüaka yamaji masü, ta ashi.

Lok Sabha nung Zero Hour mapang nung Lok Sabha nung Congress Party lenir, Adhir Ranjan Chowdhury-i, linük nung jenjang maneni atuba ajanga sensakertem timtemer aser parnok pocket nungi auyadaksür, ta ashi.

"Petrol, diesel, CNG aser PNG jenjang maneni atuba anema ozü party nung tongti lenir, Sonia Gandhi-i linük nung 'Mehngai-mukt Bharat Abhiyaan' campaign agia longkak aittsü telemtetba agiogo," ta paisa metetdaksü.

Chowdhury-isa sorkari April ita nungi National List of Essential Medicines (NLEM) kübok mozü 800 nung jenjang atutsü lemtetba atema sorkar aitsü.

"Russia-Ukraine rara ajanga jenjang atur, ta parnoki jembir. Iba ya ochi masü, kechiyong asenoki Russia dang nungi totzü alizükbaji shilem 0.5 shi dang lir.

Tesüiba küm 8 tsüingda iba sorkari (petrol aser diesel saru nungi) sen 26 lakh crore aazükogo," ta pai metetdaksü.

"Parnoki 'tajung anogotem' bener arutsüogo, ta jembir saka sensakertem atemabo iba ama timtemba anogo mangutsü. Ibayongji onoki totzü jenjang ajemtsü aser senden nung iba onük nung o lemteptsü akhanger," ta Chowdhury-i ashi.

Congress-i 'Mehngai-mukt Bharat' atema Parliament nung aser moapu naprongla nung ola adoka ayimdensü, ta pai metetdaksü.

DMK lenir, T R Baalu-i, jenjang atuba ajanga itasen agirtem tamajungba kongshir; Tamil Nadu Chief Minister, M K Stalin-ibo mezünyongi petrol litre ka nung sen 3 ajemogo, ta metetdaksü.

Baalu-isa, komaser hopta ka tsüingda petrol aser diesel litre shia nung sen 4 tashi tutet?, ta asüingdang. "Sorkari inyakba ya tim masü," ta pai ashi.

Elections mapang nung Ato kilonser, Modi-i, petrol aser diesel jenjang shilem 50 ajemtsü, ta nangzük, saka tangbo kechiba pai ola madoker, ta Baalu-i ashi.

"Tesüiba hopta ka tsüingda India tesem ajungalen jenjang tuogo. Tesüiba küm tenet tsüingda parnoki saru nung sen 26 lakh crore ajangzüktogeto. UPA sorkari subsidy sen 10 lakh crore agütsüba aser petrol

jenjang azükoba ama parnokia (NDA sorkar) inyaksüla," ta pai ashi.

TMC nungi MP, Sudip Bandyopadhyay-i, petrol, diesel aser LPG gas jenjang maneni atuba ajanga züngsem ajak tebilemstü akar, ta ashi.

Paisa, "Election aliba ajanga totzü jenjang metui liasü, saka nüburtemi election tembangba sülenbo jenjang atutsü ta bilema liasü, aser yamaji atangji atalokogo," ta ashi.

"Iba tebilemstü onük ya senden nung benoka o lemteptsüla aser jenjang atuba ya kodang anentsüar Ato kilonseri ashitsüla," ta TMC lenirisa ashi.

Anepdang opposition party temi Question Hour thinener totzü jenjang atuba atema dang o lemteptsü takhangba agüja liasü saka Lok Sabha Speaker Om Birla-i memelungi, "Zero Hour mapang nung iba onük benoktsü atema nenok nem maangka agütsütsü" ta metetdaksü.

Hombarnüa petrol litre ka nung poisa 30 aser diesel litre ka nung poisa 35 tuogo aser tesüiba hopta ka tsüingda totzü litre shia nung sen 4 nungi sen 4.10 tashi tuogo.

Amongnüa petrol litre ka nung poisa 50 aser diesel litre ka nung poisa 55 tua liasü.

Tan ita tetenzüklen LPG gas cylinder ka nung sen 50 tuogo.

Punjab nung AAP sorkari ki tashi ration bener otsüba scheme tenzük

Chandigarh, March 28 (Agencies): Hombarnü Punjab nung Chief Minister, Bhagwant Mann-i aniba AAP sorkar tasenbai state nung nüburttem nem ki tonga ration bener otsüba scheme (doorstep ration delivery scheme) tenzükogo.

Chief Minister, Mann-i, "Aam Aadmi Party (AAP) sorkari Punjab nung alirtem atema doorstep ration delivery scheme tenzüktsü telemtetba agiogo. Ozü ketdangsertemi iba atemaji nenok dang mapang asüingdangtsü aser nenoki ashiba mapang nung ration ji ki tonga bener arutsütsü," ta metetdaksü.

Paisa, iba scheme agitsü magitsüji nenok melung, anungji ki tonga bener arutsütsü mesüra tabeni arutsüji ration-card holders melung, ta metetdaksü.

"Ration ji quality kanga tajung asütsü, aser taseptsü temerük nung seper ner ki

tonga bener arutsütsü," ta chief minister-isa metetdaksü.

"Linük nüchiso anguba sülen küm 75 ajungyonga tang tashi pei ration agizüktsü atema sensakertem tarensena nokdaksüsa akümer. Ajisüaka külenbo alima digital kümogo aser tapu ajak melamela ki tonga bener arutsür. Khenkhenbo sensakertem tarensena nokdaker ration agizüktsüsa akümba agi parnok aayangi maotsüsa akümer. Ano tantsür karbo ration agizüktsü atema kilometer aika jajatsüsa akümer," ta pai ashi.

Tawa Punjab Assembly election atema nüboyimba mapang nung AAP-i nüburttem dang door step ration delivery scheme ya nangzükba liasü, aser tang parnoki nangzükba ama inyaker.

Mann-isa, iba scheme ya AAP sorkari Delhi nung mezüing tenzükba liasü, ta metetdaksü.

Goa CM atema Sawant-i tenangzükba agiogo



March 28, 2022 nü Dr Syama Prasad Mookerjee stadium, Panaji nung Pramod Sawant-i Goa chief minister inyaksü atema tenangzükba agiba noksa nung angur. Goa Angh, PS Sreedharan Pillai-i ketdangsüa Sawant nem tenangzükba agidaksü.

New Delhi, March 28 (Agencies): Asemben tashi MLA, Pramod Sawant-i Hombarnü Goa chief minister inyaksü atema tenangzükba agiogo; pai tang agi tanabenbuba Chief Minister inyaksü.

State yimtiba, Panaji anasa Dr Syama Prasad Mookerjee stadium nung ayongzükba sentong nungji Ato kilonser, Narendra Modi densema BJP lenirtem aika aden.

Goa Angh, PS Sreedharan Pillai-i ketdangsüa pa nem tenangzükba agidaksü.

Iba sentong nung Union minister Nitin Gadkari, BJP Tir, JP Nadda, Himachal Angh, Rajendra Arlekar aser taoba mapang Maharashtra chief minister Devendra Fadanavis nungera aden.

CM tenangzükba sentong ya Raj Bhavan nung masü saka moapu nung tang agi tanabenbuba agiogo. 2012 küm BJP lenir, asür Manohar Parrikar-i Goa Chief Minister inyaksü atema Panaji nung aliba Campal ground nung tenangzükba agia liasü aser

tang Dr Syama Prasad Mookerjee stadium stadium nung tenangzükba agir.

Arrshi küm 48, Pramod Sawant ya Ayurveda medical practitioner ka lir aser North Goa district kübok Sankhalim assembly constituency nungi tasembenbuba MLA lir.

2017 küm Manohar Parrikar leniba nung sorkar akümba mapang nung Sawant state assembly Speaker shima liasü. 2019 küm March ita nung chief minister Parrikar asüba sülen pa melen Sawant chief minister shima liasü.


Sawant-i mezüing Rashtriya Swayamsevak Sangh (RSS) nung aden aser chief minister inyakba mapang nunga pai küm shia RSS indang 'Sanchalan' sentongtem nung dena arur.

Tawa Goa Assembly election nung BJP-i menden 20 nung takok ngua single largest party liasü. Iba election nung Congress-i menden 11 dang angu. BJP-i independent MLA asem aser Maharashtrawadi Gomantak Party (MGP) nungi MLA ana teyari agia sorkar kümogo.



March 28, 2022 nü New Delhi nung Indian Navy tongti, Admiral R Hari Kumar (abelen)-i France Navy tongti, Admiral Pierre Vandier agizükdang tangokba noksa nung angur.

Pakistan PM Khan hopta ka tsüngta menden yutsütsü akok



Islamabad, Metsüremi/ March 28 (agencies): Pakistan Ato Kilonser Imran Khan indang Pakistan Tehreek-e-Insaf (PTI) den sendaktepa aliba Pakistan Muslim League-Quaid (PML-Q) ajanga Hombarnü opposition party Pakistan Muslim League-Nawaz (PML-N) den tezüngzüktep ka yangluogo, anungji hopta ka majungdang Imran Khan ya menden nungi alitsü akok, ta osang ka ajanga ashi.

Iba maparen meteta alirtemi ashiba agi, PML-N tir Shahbaz Sharif yagi Khan melena Pakistan ato kilonser akumtsü akok.

Ano kasa nisung ajangasa ashiba agi, putir aser dang Jamiat Ulema-e-Islam (JUI) tir Maulana Fazl-ur-Rehman yagi

Arif Alvi melena Pakistan tir akumtsü.

Chairman indang menden ya taoba ato kilonser aser Pakistan Peoples' Party (PPP) lenir Yusuf Raza Gillani dangi aotsü akok.

Punjab province indang chief minister Usman Buzdar anema no-confidence motion benok, ta osang ka ajanga ashi. Tang Punjab province assembly nung tang speaker teinyakdak, Chaudhry Pervaiz Elahi-i Buzdar melena chief minister akumtsü akok, ta ashir.

Punjab aser federal level nung tashi lemsatepa yimsü asütsü jembia liasü, ta ita tetenzüklen osang ka ajanga ashi.

PTI den sendaktepa aliba telok, Pakistan Muslim League-Q (PML-Q) ajanga ita

tetenzüklen Chaudhry Pervaiz Elahi ya Punjab province indang chief minister shimtsü takhangba agüja liasü.

Lahore assembly nung ozüing yanglur 126 dak temai tang chief minister teinyakdak, Usman Buzdar anema no-trust motion benokogo.

Pai mapa junga meinyakba ajanga ozüing yanglurtem tezü adanger, ta ashir. Chief minister menden nungi Buzdar atsüingdoktsü atema opposition temi vote 186 nüngdaker.

Punjab province assembly nung menden 371 lir, kong Imran Khan'er PTI teloki menden 183 agia lir, majority atema menden asem agi mabensa. PML-Q. PML-N aser PPP nungi menden 165, 10 aser 7 agia lir. Pakistan Rah-e-Haq Party nungi züingsem ka aser independent nungi menden pungo lir.

Buzdar ya Imran Khan indang tembar tajung ka ama züingshir aser pa ya yakta atsüingdoktsü akok, aser Imran Khan sorkar nunga kasa tia ajurutsü akok ta tetsübu lir.

Opposition ajanga Hombarnü nikongdang assembly nung Imran Khan anema no-trust motion benoktsü aser speaker Asad Qaiser-i asemnü tsüngta iba ken o benoka jembitsü.

Imran Khan-i maneni yimsü asütsü tebilemba nung sangdong kar agüja lir aser Pakistan nunger den pai par sorkar raksatsütsü merangba bendanger tashi matsüingdak mapudaktsü, ta ashi.

Kim Jong Un-i nok-o-nü tashi itshitsü nangzük



Pyongyang, Metsüremi/ March 28 (Agencies): North Korea lenir Kim Jong Un-i ashiba agi, tsükchirtem amaktsü atema tashi tait hadirtem yanglutsü asoshi linük sentong lir. 2017 küm sülen intercontinental ballistic missile (ICBM) mezüingbuba tendangba sülen anogo sishika lir pai iba olen lemsatepa liasü.

Korean Central News Agency (KCNA)-i Hombarnü

sangdongba osang ajanga ashiba agi, North Korea-i missile talila mesüra nuclear device a ka yakta tendangtsü akok.

Taküm küm tenzüker North Korea-i missile 12benbuba tendangogo, kong tawa yangluba long-range Hwasong-17 densema lir. Iba missile yagi United States kübok tesem mashi ka nung nuclear warhead ka tsükdaktstütsü.

Hwasong-17 tendangba nung densema aliba scientist aser tanga ketdangsurtem den noksa agiba mapang Kim-i, amokmeren balala koktettsü atema linük indang attack capability ajungkettsü nangzük aliasü.

"Tangar den jangyumedema tsükchir maktetsüsa prangbong hadirtem renemba aser shingai menokdangtettsüsa military tashi ajungketba ajanga dang rara nokdangtettsü, linük teküzmükba kübok toktsütetsü aser imperialists temi amokmerenba aser blackmail asüba azüoktettsü," ta Kim-i ashiba KCNA-i metetdaktstü.

Kim-i ashiba agi, North Korea-i tsükchirtem sashi sashia maktetsü atema hadir talila yanglutsü.

Pyongyang-i ashiba agi, Hwasong-17 ya anüngleni 6,248km (3,880 miles) tur 1,090km (680 miles) yima ao.

Mongintemi ashiba agi, missile ya standard trajectory ka nung akha aser iba dang nungi tenemzükba nung khara 15,000km (9,320 miles) tashi khatetsü, koba US aser US adena orr tanga tesemtem tonga otetsü. Hwasong-17 ya North indang longest-range missile lir.

El Salvador nung state of emergency benoktsü agizük

San Salvador, Metsüremi/ March 28 (Agencies): Ozüing alema inyaksangshiba teloktemi (gang) nisung tepsetyonga aoba sülen temzüing ozüing kübok nüburttem nem teküzmükba agüja aliba kar khen atema agina atatsü asoshi El Salvador parliament-i state of emergency benoktsü telemtetba agiogo.

Honibarnü ozüing alema nisung 62 tepsetba police temi metetdaktstü, koba küm semer shi nung azütokshi lendong atalokba rongnung tamajungtiba liasü.

"Onoki iba ozüing ya benoktsü agizükogo, koba ajanga ozü sorkar nem Salvador nunger taküm kümzükba ayutsü aser ozüing raksarterem anema jenjang tapet agitsü asoshi maangka agütsütsü," ta Deobarnü parliament session ka amenba sülen congress tir Ernesto Castro-i ashi.

2021 küm linük nung nisung 1,140 tepset, koba average nung nsütsünyongsük 100,000 nungi nisung 18 asüba asütsü, ajisüaka 1992 küm civil war tembangba mapang tashi dang nungibo kanga agi tajemba lir.

2015 küm El Salvador nung average nung nisung 100,000 nungi 103 tepsetba mangaoka lir, koba alima nung nisung tepsetba rate timtiba asütsü.

Emergency benokba sülen

lokti sadem sadema adenshitsu memelatsü. Iba ozüing ajanga nisung ka apuba atema kuli agütsütsü temeden agüja aliba agintsütsü aser apuba sülen obendanger ajanga ken o bentettsü atema maangka magütsütsü. Iba den bendenloksema nisung ka ghonda 72 dak tema sota yutettsü.

Tir Nayib Bukele, shibai parliament dang emergency agizüktsü atema asüngdanga liasü, pai vote agitepba sülen jenjang tapet agiba atema tenüngsang agütsü.

"Jenjang agitsü alibattem ya ken o dak sendaka aliba institution tapettemi benoka inyaktsü aser nüngdakba mapang nung dang sangdongtsü. Nisungtem timba atema anogoshi libaliro nung kecha tetsükdaktstü madoktsü. Tsüngremi asenok ajak moajang," ta Bukele-i Tweet asü.

Paisa, pai linük nung tepuokdak tekolaktem dang ozüing anema inyaksangshiba telok balala züingsemtem parnok indang takdang nung shibanga ayutsü tetuyuba agütsüogo.

Tir-i, chiyongtsü rationalized sütsütsü ta ashiba den pai item kiralongrarterem mesütsü atema school tem nungi budget magintsü ta ashi.

Turkey nung jembishinü Mongulbar tenzüktsü akok: Kremlin

Moscow, Metsüremi/ March 28 (Agencies): Turkey nung Russia aser Ukraine nungi ketdangsurtem tsüngta jembishinü Mongulbar tenzüktsü akok, ta Kremlin-i ashi.

Russia Tir Vladimir Putin aser Turkey Tir Recep Tayyip Erdogan na Deobarnü telephone ajanga jembiba mapang Istanbul nung iba senden ayongzüktsü molungtep, aser iba ya ajanga ceasefire alitsü Ankara teimla lir.

Turkey-ibo jembishinü ya Hombarnü sa tenzüknung ajungtsü ta ashi saka ken o jembitsüpur ghonda ishika tsüngta ang tonga arutsü, anungji ajibo tamakoktsü, ta Kremlin odongtar Dmitry Peskov-i osangbener dang ashi.

Taoba mapang ishíben jembishinü akaba nung terenlok kangabo mali, ta pai shia liasü, saka Hombarnü pai tejak-o-tejak jitepa jembishinütsü kanga tongtipang, ta ashi.

Ukraine northeastern tsütsü Kharkiv region nung sepaitemi Russian sepa dak meyiper amaker, ta iba governor ajanga ashi.

Mala Rohan aser Vilkhivka yimtsüngtem Ukraine sepa kübok lir, ta Oleg Sinogubov-i

Telegram post ka nung ashi.

Ukraine nung yimti tulutiba jenjang tanabuba nung aliba, Kharkiv nungi kilometre 124 shi pilar Izyum yimti nung kanga sashia raraba mapang lir, ta paisa ashi.

Russia-i February 24 nungi amak tenzüker Ukraine nung sen billion \$564.9 jenjang ki-o-jen aser rongsenketzung akoksaogo, ta Ukraine economy minister-i ashi.

Yulia Svyrydenko-i Facebook post ka nung ashiba agi, iba rara nung lenmang kilometre 8,000 raksatsü aser ki square metre million 10 raksaogo.

Kasa mapang Putin aser Ukraine Tir Volodymyr Zelenskyy na tsüngta tangbo jembishinü makatetsü, ta Russia foreign minister-i ashi.

Tena tsüngta tekeraba nung senden mena pei tangatetba lemsatepba ajanga tajangzük alitsü, saka tongtipang onüktem nung Ukraine aser Russia tsüngta tangatetep kati aruba mapang ang ibaji ataloktsü, ta Sergey Lavrov-i ashi.

Rara anentsü atema jembishinütsü asoshi Zelenskyy-i Putin dang tejak-o-tejak jitepa jembitsü aiben shia arur.

May 18 aser 19 nü Amazon Smbhav Summit 2022 agitsü

Kohima, Metsüremi/March 28, 2022 (TYO): Taküm May 18 aser 19, 2022 nü 3buba 'Amazon Smbhav' ayongzüksü, ta Amazon India sangdong ka ajanga metetdaksü.

Anogo ana tashi virtual ajanga agitsü aliba 'Amazon Smbhav' sentong nung policy makers, industry nung lennir tongti, asalentongtem tajung yanglurtem, startups aser Amazon lennir temi shilem agitsü.

India tesem ajunga nung lakh jenti lapoka aliba local store aser shishilembaba tesem indang digitization karadaksütsü aser r o n g s e n k e t z ü n g renlokdaksütsü mechi technology tajungtiba nung amshitsü asoshi iba sentong nung parnok olemteptsü.

Iba summit nung tongtibang onüktem, panel discussions, masterclasses aser industry ajunga nunh technology amshiba indang tongtibangtem

nung olemtep akataü. Kasa mapang, onük talisa Social Empowerment & Enablement for Inclusive Economic Growth, Innovating for India & Creating Digital Infrastructure aser tanga nung ajemdaker sensaksem agitsü. Amazon Smbhav 2022 atema registration tem amazon.in/smbhav website nung lapoka lir.

Küm shia Amazon Smbhav ajanga 'Amazon Smbhav Awards' ayongzüker, kong pei pei tata tesem nung maparen takok ngua aotsü asoshi inyaker aser Atmanirbhar Bharat mapatong nung shilem tulu agir business, innovator aser kijatem jangjatetta tetushi agütsür.

Taoba küm business innovator aser kija 1200 dak temai category 11 nung Smbhav Awards atema tenüng agütsü. Taküm, Smbhav Awards nung category tasen pezü densema

category 15 nem award agütsütsü renema lir.

Manish Tiwary, Country Manager, India Consumer Business, Amazon-i ashiba agi, "Business tilatem tajungba kumtsütsü asoshi onoki bendanga agütsür inyaksü, kong local store aser kirana dokan tilatem digital nung liromedema odaksütsü asoshi onoki inyaksü. India indang '\$ 1 trillion digital economy' nükjidong atalokdaksütsü mechi tasa lemsatepa aser olemteptsü asoshi Amazon Smbhav 2022 nung policy makers, nungtugu corporate lennir, takok tulu angur entrepreneur, business kibur tasen aser Amazon lennir tem longjemdaksütsü asoshi yongyar."

Amazon Smbhav 2022 ya May 18 aser 19, 2022 nü agitsü aser taküm mezüng tongtibang yimitem nung regional summit ayongzüksü asoshi Amazon tebilemba lir.

MULOUNGEN O



Onoki teti meima aliba Asür. **Mrs Tamsunenla** (Mangmetong) anojungi ajungbena iba lima nungi 19 March 2022 nü pila or onok mangyim tejashi aser shisabulu khuret agi sünger alidang, ozü den asü khuret lemsatepa nübu, rongsen, shisatsü aser sarasadem agi, lokti balala, kiyonger, medemsor, kinunger aser kija kibongtem shirnokisa yaritepogo, nenok ajak dang kanga pelaba lemsateper. Nenok temeim mapa asoshi asen Teyanglur Tsüngremi talubusa moajangni ta ozü sarasadem.

Temeim Kinungbo, Chirnur aser Semchir.



Office of the
Aoli Pongen Mungdang
H.Q. Mokokchung: 798601: Nagaland

SANGDONGER

Aoli Pongen Mungdang Executive meeting 8th April 2022, anepdang 10 ako nungi K. Rongsen kimen kidang alitsü. Anungji unit/yimsüng ajak nungi agüja aliba anogo mapang shitak nung absent mesüi arua atentsü metetdaksür.

Iba sangdong dak alaka tanga shity meyoktsü.

Sd/-
Sakowati
President, APM

Sd/-
Kilenrangba
Gen. Secy. APM

94th Academy Awards: Will Smith-i 'Best Actor' Award angu



Los Angeles, California nung 94th Academy Awards sentong agiba mapang "King Richard" atema Will Smith-i Best Actor award agizükba noksa nung angur.

Los Angeles, Metsüremi/March 28, 2022 (Agencies): Deobarnü, Los Angeles kübok Dolby Theatre nung 94buba Academy Awards/Oscars 2022' sentong agia liasü. Iba Academy Awards sentong, koba February tatemlen mesüra March tetenzüklen agitsü renem, COVID-19 wara ajanga iba sentong atema anogo atsülangtsü.

Tesüiba küm asem tashi host' medeni Oscar sentong agia aru, saka taküm iba nungtugu award sentong ya comedian Wanda Sykes aser Amy Schumer na den actress Regina Hall nungeri ketdangsüa (host) agiogo.

Iba Academy sentong tenzüka Beyoncé-i 'King Richard' film nungi 'Be Alive' ken ka aten. Beyoncé indang ken (Be Alive) aser 'King Richard' film naprongla taküm Oscars nomination nung dena liasü.

Academy Award takok angur Afro Latina aser LGBT actor rongnung Ariana DeBose mezüng kümogo.

'CODA' nung angopur nisung tajung ka shilem agiba atema Troy Kotsur-i best-

supporting actor category nung Oscar award ka angu.

Iba Academy Awards sentong magidang, 'The Power of the Dog' ajanga nomination 12 ngua liasü. Iba film sülen Dune-i nomination 10 aser 'Belfast' den 'West Side Story' nati nomination tenetnet angu. Ano külen, Will Smith indang 'King Richard' film ajanga nomination trok angu.

Taküm Oscars 2022 nung Best Picture atema film 10 tashi nominate süogo. Best Picture atema nomination rongnung Belfast, Coda, Don't Look Up, Drive My Car, King Richard, Dune, Licorice Pizza, Nightmare Alley, The Power of the Dog aser West Side Story dena liasü.

94th Academy Awards 2022 sentong nung takok angurtem:

- Best Picture : CODA
- Best Director : Jane Campion (The Power Of The Dog)
- Best Actress : J e s s i c a Chastain (The Eyes Of Tammy Faye)
- Best Actor : Will Smith (King Richard)
- Best Supporting Actress : Ariana DeBose (West Side


- Story)
- Best Supporting Actor : Troy Kotsur (CODA)
- Best Original Screenplay : Belfast
- Best Adapted Screenplay : CODA
- Best International Feature Film : Drive My Car (Japan)
- Best Animated Feature Film : Encanto
- Best Documentary (Feature): Summer Of Soul
- Best Documentary (Short Subject) : The Queen of Basketball
- Best Short Film (Animated) : The Windshield Wiper
- Best Short Film (Live Action): The Long Goodbye
- Best Original Score : Dune
- Best Original Song : "No Time to Die" - Billie Eilish and Finneas O'Connell (No Time to Die)
- Best Cinematography : Dune
- Best Costume Design : Cruella
- Best Production Design : Dune
- Best Makeup and Hairstyling: The Eyes of Tammy Faye
- Best Sound : Dune
- Best Film Editing : Dune
- Best Visual Effects : Dune

'The Contractor' April 8 nü sayatsü

Metsüremi/March 28, 2022 (Agencies): Hollywood star Chris Pine indang taruba film 'The Contractor' ya April 08, 2022 nü India nung sayatsü. Tarik Saleh-i iba film direct süogo.

'The Contractor' ya ex-marine James Harper (Pine) indang otsü asütsü, kong James ya mapa nungi anentsür aser par kibong kümzüksü asoshi pai private military organisation ka nung adener.

Chris Pine den 'The Contractor' nung 24' actor nung Gillian Jacobs aser Eddie Kiefer Sutherland aser 'Hell or High Water' nung actor Ben Foster nati tongti shilem agiba angutsü. Tena dak alaka, iba film



CHRIS PINE
THE CONTRACTOR

ning Gillian Jacobs aser Eddie Kiefer Sutherland aser 'Hell or Marsan nati shilem agiogo.

India nung PVR Pictures ajanga April 08, 2022 nü 'The Contractor' sayatsü.



"Merükmejuba nung arok shilem" tangatetba nung ajemdaker Hombarnü (28.03.2022) Mongsenyimti Senso Telongjem Tzüdikong Town ajanga Tzüdikong Town kübok tongtipang yimdong tesemtem merükteta amongba noksa nung angur.

7buba Frolic Cup asayamung osang



Dimapur, Metsüremi/March 28 (TYO): Frolic Club Medziphema-i ayongzüka tang Medziphema local ground nung asaya aliba Forlic Cup asayamung nung Hombarnü United Falcon Club Junior-i goal ka agi Zillia FC koka taruba round-i iogo. Asaya nung goal ka ya Tonmingthan-i minute 64 buba nung idakja liasü. Asaya nung Zillai FC nungi asayar Nehminlem aser Daniel na nem asayar yimya shidak mebenshiba atema yellow card agüja liasü.

Tanabuba asaya nung Amigos FC aser Sparkle United FC na goal 2-2 agütsür goal kasasa nung asaya tembang. Asaya tenzüker minute 4buba nung Kevitsokho-i Sparkle atema mezüngbuba goal idaktsü, ajisüaka Amigos nungi

asayar Kekhrie-i penalty ka ajanga minute 22buba nung iba goal küptok. Asaya tanabuba shilem nung Amigos nungi asayar Sunep-i minute 39buba nung ano goal ka idakja par telok tejakdang aküm, saka ano Sparkle nungi asayar Henry Savino-i minute 56buba nung par telok atema tanabuba goal agüja iba goal-a küptok. Asaya nung Amigos nungi asayar Benry aser Shalo aser Sparkle FC nungi asayar Tiasang nung nem yellow card agütsü.

Asaya goal kasasa nung tembangba sülen tie breaker asayaba mapang Amigos-i goal 5-3 agi asaya koka liasü.

Maneni tasembuba asaya Ukigei FC aser Sechü Zubza FC Academy na asaya liasü. Mapa atakzüka aliba tashi nung telok anapronglai goal kaka

dang idaktsüba sülen tie breaker ajanga takoker bendangtsüsa aküm. Asaya nung Sechü Zubza Academy atema Mhaphruovito-i minute 36buba nung mezüngbuba goal idaktsü aser iba sülen Viphrülie-i minute 57buba nung Ukigei FC atema goal ka idakja liasü.

Tie breaker nung Ukigei FC-i goal 5-4 agi asaya akok.

Hombarnü tatembangbuba asaya nung Swat team-i goal 2-0 agi Fantasy FC madak takok ngua taruba round-i iogo. Neizosetuo-i Swat FC atema mezüngbuba goal minute 7buba nung idaktsü. Asaya tanabuba shilem nung Fantasy FC-i asendenshir kanga junga asaya saka goal midaktsütet. Iba sülen Fantasy FC nungi asayar Zakiebeituo-i aibelena ball mashileni metsüa par goal nung goal ka idakja liasü. Asaya nung Fantasy FC nungi asayar Vizobeito Keyho nem yellow card ka agüja liasü.

March 29 nü asayatem yamai alitsü:


Ton FC vs Kuki Youth Club (06:30am)

St. Joseph University vs Patkai Christian College (08:30am)

The Beckon FC vs Tribal United (01:30pm)

Medziphema Village Youth Org. vs Paohao Memorial FC (03:00pm).

Longtsukumba Ao-i GAMMA world championships nung silver angu



Dimapur, Metsüremi/March 28 (TYO): Global Association of Mixed Martial Arts (GAMMA) World Championships nung Longtsukumba Ao-i silver medal nguogo. Iba asayamung ya Sporthallen Zuid, Amsterdam, Netherlands nung March 23 nungi 27 tashi asaya liasü.

65.8 kg elite MMA category final asaya nung Longtsukumba Ao, Jordan nung asayar Mohammad Wasfi Ismael Eid den asaya. Asaya tepeyong Longtsukumba-i anebilemba kecha mesayui kanga tashi ita asaya saka tia maka takok mongutet.

Iba asayamung nungsa Arsenba Ozukum-i 56.8 kg striking MMA category nung bronze medal ngua liasü. Iba asayamung nung Naga nung rongnungi Avizo Lanamai (70 kg elite MMA category) aser Limasunep Imchen (61.2 kg elite MMA category) natia shilem agia liasü.

Naga nung asayatem ajak Combat Academy Nagaland nung training agi aser parnok meina coach Khriemelie Metha oa liasü.

GAMMA World Championships nung India nung asayar ajak senteper parnok 33-i shilem agia liasü aser India team-i medal 11 ngutetogo.

India team nungi asayar Surbala Laishram-i otsü tasen

ka yanglua 115 LBS Striking MMA final nung Kazakhstan tsür Tomiris Zhussupova koka liasü. Laishram ya GAMMA World Championship nung India nung asayatem rongnungi Gold Medal anguba mezüngbuba asayar lir.

GAMMA world championships ya 2021 küm December ita Germany yimtiba Berlin nung asayatsü liasü saka Covid-19 temzüng ozüing dak jemdaker thinentsüsa aküm aser Netherlands-i belener ao.

Asayamung nung India team nungi takok angurtem yamai alitsü:

Gold Medal:
Surbala Laishram (115 LBS Striking MMA)

Silver Medals:
Kishor BK (115 LBS Striking MMA)

Longtsukumba Ao (145 LBS Striking MMA)

Sarita Rathod (105 LBS MMA)

Indiyana B (145 LBS Striking MMA)

Bronze Medals:
Havish Reddy (115 LBS MMA)

Naorem Dinesh (125 LBS MMA)

Arsenba Ozukum (125 LBS Striking MMA)

Veinii Suffix (125 LBS Striking MMA)

Peter Charles (-265 LBS Striking MMA)

Syed Shahid Hussain (115 LBS Striking MMA).

Küm 36 sülen Canada World Cup atema qualify süogo



Metsüremi/March 28, 2022 (Agencies): Deobarnü Jamaica goal 4-0 agi akokba sülen Canada tang agi tanabenbuba World Cup atema qualify süogo. Küm 36 sülen tang mezüngbuba parnok World Cup nung asayatsü.

CONCACAF qualifying telok nungi Mexico aser United States nati takok nguaka ano qualify mesüi lir aser Costa Rica-a qualify asütsü atema timla mesamai lir.

Deobarnü Chelsea midfielder Christian Pulisic-i hat-trick ka idakja United States-i goal 5-1 agi Panama madak takok angu aser Mexico-i goal ka agi Honduras madak takok ngua liasü. Mexico atema goal ka ya Edson Alvarez-i idaktsü.

Deobarnü asaya akokba sülen Canada-i point 28 nguteta parnok temaba jenjang nung United States aser Mexico na dang nungi point asem agi timba lir. Costa Rica-i goal 2-1 agi El Salvador akokba sülen parnok ano point asem agi tekübokba jenjang nung lir.

Iba telok nungi temaba jenjang nung tembangba team asem November ita asayatsü aliba World Cup atema qulify asütsü aser pezübuba nung tembangba team intercontinental playoff nung Oceania team ka den asayatsü.

Bodhbarnü Mexico aser El Salvador na aser United States o Costa Rica na asayatsü. Canada-a tatembangbuba asaya Panama den asayatsü. Mexico aser United States

naprongla qualify asütsü atema draw dang asütsü nungdaker.

Brehostibarnü Costa Rica goal 1-0 tazüngla agi makokba sülen Canada-i asendenshir kanga junga asaya aser Jamaica madak takok ngua liasü.

Asaya mezüngbuba shilem nung Cyle Larin aser Tajon Buchanan nati mezüngbuba goal ana idaktsü aser iba sülen asaya tanabuba shilem nung Junior Hoilett-i goal ka aser Adrian Mariappa-i own goal ka idakja parnoki asaya ayong ayonga akok.

1986 küm Mexico nung asayaba sülen Canada taküm mezüngbuba World Cup nung asayatsü. 1986 küm parnoki asaya asemprongla makok aser goal ka danga midaktsütet.

BILEMDANGANG

"Nisung ka majungba apia pa dang tebeshi, saka nai akokba tajungtiba agi yariang."